

ist gewesen/das man sie in einer Hand hat halten können/wie Iud. c. 7.  
verf. 20. zuersehen. Der form vnd gestalt aber / hat man gar keine  
nachrichtung/wie auch gleicher massen/was sie vor einen Laut von sich  
gegeben / ob es ein Unifonus gewesen / oder ob man Variationes oder  
unterschiedliche Thon/wie heutiges Tages auff den vnßrigen Posau-  
nen oder Trommetten geschicht/ darauff haben können. Es lest sich  
aber ansehen/das man Variationes darauff haben können/weil vnters  
schlecht Blasen vnd Trommeten ein vnterscheid gemacht wird.  
Schlecht Blasen ist geschehen/entweder mit einer Trommet / weñ  
die Fürsten vnd Obristen/oder mit beyden / wenn die Gemeine sich für  
die Thür der Hütten des Stiffts versamen sollen. Trommeten  
aber ist geschehen / entweder in den Festen vnd Newmonden / oder in  
Kriegesfleufften / wenn man die Läger auffbrechen / oder in den Streit  
ziehen sollen. Num. 10. v. 3. 4. 5. 6 9 10.

Es wollen etliche fürgeben / das die Posauen / so das Jubell-  
oder Erlasß Jahr anzuzeigen Levit. c. 25. v. 10. gebraucht worden/  
(von dessen Hall es das Hall-Jahr genennet)sollen auß einem Horn  
von einẽ Wider gemacht worden seyn; Wiewol andere vermeinen/dz  
sie solche form vnd gestalt zwar gehabt haben/aber auß Silber oder an-  
dern Metal gemacht gewesen seyn.

Pfeiffen wird zwar 1. Sam. c. 10. v. 5. 2. Sa. c. 6. v. 5. 1. Reg. c. 1. v. 40.  
in den Psalmen vnd vielen andern örtern der Schrift gedacht/ auch  
wie sie bey Salbung der Könige / 1. Regum c. 1. v. 40. Gastungen/  
Esaia 5. v. 15. vnd Leichbegengnüssen Matth. 9. v. 23 gebraucht wor-  
den: Aber der Materiæ, darauff sie gemacht/ viel weniger der form vnd  
gestalt / auch wie viel sie Löcher gehabt / oder wie viel Thon sie von sich  
geben / gar nicht erwehnet.

Der König David hat nicht allein eine berühmte / wolbestalte  
vnd Volckreiche Capellen zu Jerusalem angeordnet / sondern auch  
viele Instrumenta erfunden / vnd auß Hebenholz / so auß Ophir ge-  
bracht vnd vor diesem in Palæstina nicht gesehen worden / machen las-  
sen/wel